



Datë: 06.08.2025

Numër Protokolli: 5482/2025

A.nr.1070/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj-Demi, anëtar, me Atdhe Gashi, në cilësinë e procesmbajtësit, ka shqyrtuar ankesën me numër A.nr.1070/2025, të datës 04.06.2025, të parashtruar nga ankuesja L.H, të cilën sipas autorizimit e përfaqëson Avokat Petrit Prekazi nga Prishtina, kundër organit të punësimit: Ministria e Punëve të Jashtme dhe Diasporës, në çështjen juridike “*kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1, nenin 16, paragrafi 3 dhe nenin 18, paragrafin 1, nën paragrafin 1.7 të Ligjit Nr.06/-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje me dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me 06.08.2025, mori këtë:

V E N D I M

Hedhet poshtë si e palejuar ankesa me numër A.nr.1070/2025 e datës 04.06.2025, e parashtruar nga ankuesja, L.H.

A r s y e t i m

Nëpunësja civile L.H (në tekstin e mëtejme referuar: ankuesja), përmes përfaqësuesit të autorizuar, më datë 04.06.2025 ka parashtruar ankesë me numër protokolli 3771/2025 të regjistruar nën shenjën A.nr.1070/2025 në Këshillin e Pavarur Mbikëqyrës për Shërbimin Civil të Kosovës, kundër Vendimit me Nr.231/2025 të datës 15.05.2025 të Sekretarit të Përgjithshëm të Ministrisë së Punëve të Jashtme dhe Diasporës.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) duke ju referuar shkresave të lëndës të parashtruar nga palët në procedurë ka gjetur se ankesa e parashtruar nga ankuesja me datë 04.06.2025 është e palejuar, *sepse*:

Nga administrimi i shkresave të lëndës rrjedh se ankuesja është e punësuar në Ministrinë e Punëve të Jashtme dhe Diasporës, respektivisht e njëjta sipas Akt emërimit me Nr.948/2024, të datës 01.08.2024, është e emëruar në pozitën e punës Zyrtar e Lartë për Politika të Sigurisë, në Divizionin për Politika të Sigurisë pranë Departamentit për NATO dhe Politika të Sigurisë.

Si rrjedhojë, Sekretari i Përgjithshëm i Ministrisë së Punëve të Jashtme dhe Diasporës, me datë 15.05.2025 ka nxjerrë Vendimin me Nr.231/2025, përmes të cilit akt ankuesen e ka caktuar Ushtruese të Detyrës së Udhëheqësit për Politika të Sigurisë-Departamenti për NATO dhe Politika të Sigurisë, dhe atë nga data 15.05.2025 deri më 14.11.2025, me arsyetimin se pozita përkatëse është e lirë.

Ankuesja, në ankesën e parashtruar në Këshillin e Pavarur Mbikëqyrës për Shërbimin Civil, pretendon se Vendimi i kontestuar është nxjerrë mbi cenimin dispozitat e Ligjit për Procedurën Administrative dhe shkeljes së rregullave dhe parimeve të parashtruara në ligjin për shërbimin civil të Republikës së Kosovës, vërtetimit të gabuar të gjendjes faktike, zbatimit të gabuar të së drejtës materiale, cenimit të dispozitave të Ligjit për Shërbimin e Jashtëm të Republikës së Kosovës, Rregullores për Shërbimin e Jashtëm dhe Udhëzimit Administrativ për sistemin vlerësimit të rezultatit të punës së nëpunësve të Shërbimit të Jashtëm. Andaj kërkon aprovimin e ankesës dhe anulimin e Vendimit me Nr.231/2025 të datës 15.05.2025.

Kolegji i Këshillit lidhur me pranueshmërinë e ankesës iu referua dispozitave të Ligjit Nr.08/L-197 për Zyrtarët Publikë, përkatësisht nenit 27 paragrafi 3 ku përcaktohet se: *3. Nëpunësi civil ka të drejtë të paraqes ankesë në Këshillin e Pavarur Mbikëqyrës të Shërbimit Civil të Kosovës për çdo veprim apo mosveprim, që i cenon të drejtat apo interesat e ligjshme, të drejta këto që burojnë nga marrëdhënia e punës në shërbimin civil*, si dhe dispozitave të Ligjit Nr.05/L-031 për Procedurën e Përgjithshme Administrative, përkatësisht nenit 14 ku përcaktohet se “*Palë në procedurën administrative mund të jetë çdo person fizik, person juridik apo grup personash me një interes të përbashkët: 1.1. me kërkesë të të cilit organi publik ka filluar procedura administrative; 1.2. ndaj të cilit ka filluar procedura administrative apo të cilit rezultati i procedurës administrative mund t'i cenojë të drejtat apo interesat juridike. 2. Palë në procedurën administrative janë, gjithashtu, dhe mbrojtësit e interesave publike të autorizuar me ligj të veçantë, si dhe mbrojtësit e interesave kolektive apo të interesave të gjera të publikut, nëse këto interesa mund të cenohen nga rezultati i procedurës administrative*”, si dhe nenit 124 paragrafi 1 të të njëjtit ligj me të cilin parashihet se: *Pala ka të drejtë të ushtrojë mjetet juridike administrative ndaj çdo veprimi apo mosveprimi administrativ, nëse pretendon se të drejtat apo interesat e saj juridike cenohen nga ky veprim apo mosveprim*, dhe si rrjedhojë referuar dispozitave përkatëse ligjore, Kolegji i Këshillit, konstaton se organi përkatës i punësimit në rastin konkret, ankuses nuk i ka cenuar ndonjë të drejtë apo interes juridik lidhur me marrëdhënien e saj të punës, andaj e njëjta nuk ka legjitimitetin e palës në këtë çështje juridiko-administrative dhe rrjedhimisht në mungesë të legjitimitetit të palës ankesa A.nr.1070/2025 është e palejuar në kuptim të nenit 129 paragrafi 1 nën paragrafi 1.2 të Ligjit Nr.05/L-031 për Procedurën e Përgjithshme Administrative.

Kështu që, për sa më sipër, Kolegji konstaton se në rrethanat e rastit konkret nuk janë plotësuar kushtet ligjore për pranueshmërinë e ankesës në kuptim të nenit 129 paragrafi 1 nën paragrafi 1.4 ndërlidhur me nenin 125 paragrafi 1 të Ligjit Nr.05/L-031 për Procedurën e Përgjithshme Administrative, dhe se duke u mbështetur në dispozitat e nenit 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi që të hedhë poshtë ankesën si të palejueshme, siç është përcaktuar në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm, mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.1070/2025

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dorëzohet:

- Përfaqësuesit të autorizuar të ankueses, Avokatit Petrit Prekazi;
- Udhëheqësit të Njesisë për Menaxhimin e Burimeve Njerëzore në Ministrinë e Punëve të Jashtme dhe Diasporës; si dhe,
- Arkivit të KPMSHCK-së.